

TUTÚ NÍ CADÚHA TÉ PĀBLÚ QUIHÍⁿ NDAHA ÑÁYIU ÑUÚ CÒLOSÁ

Té Pāblú cādūha-dé tutú quihíⁿ ndaha ñáyiu x̄ndecu ichi Xítóhó Jesucristú ndécú ñùú Còlosá

¹ Yúhú té Pāblú ní tendaha ñaha Yá Ndiöxí cāháⁿ-í tnúhu Xítóhó Jesucristú núú ñáyiu chi ducaⁿ cuíní mée Yă Ndiöxí cunduu, te cādúha-í tutú-a ndihi té Timùteú ²cuendá daquixi-í ndaha nchòhó ñáyiu ñuú Còlosá, ñáyiu cùu cuendá Yă Ndiöxí, ñáyiu quìde ndáá ndécú ichi Xítóhó Jesucristú, te xicáⁿ tǎhù-í núú Tǎtá-ó Dütú Ndiöxí sá ïo na ch̄ndee chitúu ñaha-gǎ xii-ndo, te ducaⁿ ndí nduú-gá ná cādá te ío váha cuu iní-ndó c̄ndecu-ndo.

Té Pāblú cāháⁿ ndihi-dé Yă Ndiöxí cuendá ñáyiu sàndáá iní ñáhá xii Xítóhó Jesucristú

³ Te ducaⁿ-ni cāháⁿ ndihi-ndí Yă Ndiöxí Yaá cúu Tǎtá Xítóhó Jesucristú ndàcáⁿ tǎhú-ndí núú-gǎ cuendá nchaa nàcuáa quìde-ndo ndecu-ndo, ⁴ chi ñihí-ndí tnúhu sá ïo sàndáá iní-ndó Xítóhó Jesucristú, te ducaⁿ ïo cùu iní-ndó nchàa ñáyiu cùu cuendá Yă Ndiöxí. ⁵ Te ducaⁿ quìde-ndo chi sàndáá iní-ndó sǎ ndúú tǎhú-ndó c̄ndecu-ndo núú ndécú Xítóhó Jesucristú, te tnúhu-ánⁿ ñí ñihí-ndó c̄tnàhá ní x̄indedóho-ndo tnúhu ndáá tnúhu Xítóhó Jesucristú. ⁶ Te tnúhu Xítóhó Jesucristú tá x̄ité nuu-xi ñihí ñuyíú cuáháⁿ. Te vai ñáyiu ta sàndáá iní-yu cuáháⁿ, te ta quìde-yu mee-ni sǎ vǎha cuáháⁿ ndécū-yu ichi-gá. Te nchòhó chi ndée c̄tnàhá ní tecú dóho-ndo tnúhu-gá ní quesaha-xi ta cùu vai ñáyiu ñuú-ndó tá quìde ndáá-yu núú-gǎ cuáháⁿ. Te dàvá-ánⁿ ñí cutnùnì ndáá ndisa iní-ndó sǎ Yă Ndiöxí ío ch̄ndee chitúu ñaha-gá xii-ndo. ⁷ Te ducaⁿ

nĩ dánèhé ñáhá tẽ Ępafrás tée ío cùu iní-ndí, chi tnàhá-dé ío quide ndáá-dé xínú cuèchi-dé núú Xítohó Jesucristú quidé-dě núú-ndí dácuaàha ñaha-dé xii-ndo tnũhu-gá. ⁸ Te càchí tnũhu-dé xii-ndí sá ïo cùu iní ñáhá-ndó xii-ndí, te ducaⁿ quide-ndo chi Espíritú Yá Ndiõxí chindèe ñaha-xi xii-ndo.

⁹ Te ndéé cútñàhá ní níhí-ndí tnũhu nàcuáa quide-ndo ndecu-ndo ndéé dàvã-áⁿ nĩ ngüíta-ndí ñá túú dàña ndee-ndí xicáⁿ táhú-ndí núú Yá Ndiõxí cuendá-ndó sã Espíritú-gá ná tàxi-xi nchaa-gá sá cúmãní quiní tnùní-ndó, te ducaⁿ te cutnùní váha-gá iní-ndó nàcuáa cuìní Yá Ndiõxí cada-ndo. ¹⁰ Te sá dúcáⁿ te ndacu-ndo càda-ndo mee-ni sá vãha dàtná cuìní Xítohó Jesucristú cada nchaa ñáyiú ndècu ichi-gá. Te ducaⁿ ïo nduu vétú iní-gá te núu na càda-ndo nchaa núú sã vãha. Te ducaⁿ ïo-gá cuita cutnùní iní-ndó nchàa nacuaáa cuìní Yá Ndiõxí cada-ndo. ¹¹ Te mee-gã cúú-gã Yaá ío cùnuu, te ñiu-gá ío chindee ñaha-gá xii-ndo, te cudíí iní-ndó cuèi nándi na càda ñaha ñáyiú xii-ndo sã cuendá-gá, te ducaⁿ ïo cunduu càhnu iní-ndó. ¹² Te ndacáⁿ táhú-ó nũú Dütú Ndiõxí chi ní quide túha ñaha-gã xii-o cuendá nduu táhú-ó cùndecu-o ndíhi nchaa dava-gá ñáyiú yìndaha-gá xĩndecu núú cándòo canine ñá túú tnàhí-gá ni ñíⁿ cuéchi ïó. ¹³ Te ñiu-gá ní quide ní dáñá-ó nchàa ichi cuehé ichi duha núú táxi tnùní yucu ñãvãha, te ní nachihi ñaha-gã xii-o ndàha Déhe-gá Yaá ío cùu iní-gá. ¹⁴ Te Déhe-gá ní xíhí-gá cuendá sá nchóó cãcu nihnu-o nũú ùhú núú ndàhú, te ní quide càhnu iní-gá nchaa sá cuèhé sá dúhá nĩ quide-o.

Ñáyiú cùu ñíⁿnuu ndíhi Yá Ndiõxí cuendá sá ní xíhí Xítohó Jesucristú

¹⁵ Te Yá Ndiõxí cúú-gã Yaá vá cúú quìní-ó dico Xítohó Jesucristú chi ní quixi túu-gá ñuyúú-a, te ní quide-gá

nchaa nàcuáa sàni iní-gá. Te dàtná-ni sàni iní-gá te ducaⁿ sàni iní Yă Ndiöxí, te Yaá-áⁿ ducaⁿ-ni ndècu-gá ndéé cútnàhá vátá ngăva-gá ñuyúú. ¹⁶ Te Xítóhó Jesucrìstú ní quide-gá núú Yă Ndiöxí ní cadúha-gá nchaa sá ìó andiù ndìhi nchaa sá ìó ñuyúú-a, te ní cadúha-gá nchaa sá cúú quini núú-ó cùndehe-o, ndìhi nchaa sá vă quini tnàhí-o, ndìhi nchaa espíritú cùnùu vihi xinu cuechi núú Yă Ndiöxí, ndìhi nchaa dava-gá espíritú xínú cuèchi. Te nchaa ní cadúha Xítóhó Jesucrìstú chi ducaⁿ nǐ cachí Yă Ndiöxí cunduu. Te ducaⁿ nǐ cachí Yă Ndiöxí cunduu cuendá nchaa cuu-xi mee-ni sǎ văha sá cúú-xí Xítóhó Jesucrìstú. ¹⁷ Te Xítóhó Jesucrìstú ducaⁿ-ni ndècu-gá ndéé cútnàhá vátá ngăva-gá ñuyúú-a, te diù núú ndáhá-gă cándòdo ñuyúú-a, ndìhi andiù, ndìhi nchaandi túhú sá ìó. ¹⁸ Te diù Xítóhó Jesucrìstú cùnùu-gá yíndàha ñaha-gá xii nchaa nchoo ñăyiu ndècu ichi-gá, te diù-gá quídé-gă ndécú văha-o nǔú-gă. Te núú ncháá ñăyiu ndoto diù-gá cúú-gă Yaá ío càhnu cuu sa ní ndoto, te sá dúcáⁿ nǐ ndoto-gá te xíáⁿ cúú-gă Yaá ío tàxi tnuní nchaandi túhú sá ìó ñuyúú-a ndìhi andiù. ¹⁹ Te ducaⁿ ìo cùnùu-gá táxi tnùní-gá chi ndáá sá ìⁿ-ni cuu-gá ndìhi Yá Ndiöxí. ²⁰ Te Xítóhó Jesucrìstú ní xíhí-gá núú cùrúxí, chi ducaⁿ nǐ cuini Yă Ndiöxí cunduu cuendá sá vă yôo ìⁿ-gá cuu úhú iní ñáhá xì-gá cuèi ñăyiu xíndecu ñuyúú-a, te cuèi cue espíritú ndécú àndiù.

²¹ Te nchòhó cútnàhá vátá cùndècu-gá-ndó ìchi Xítóhó Jesucrìstú ñá túú tnàhí ni xôo cáháⁿ ndìhi-ndo-gă, chi mee-ni nǐ xóo cuu úhú iní-ndó-gă, te mee-ni nchaa sá cuèhé sá dúhá nǐ xóo cunuu nǐ xóo cada-ndo ni cùu, dico Xítóhó Jesucrìstú ní quide-gá ní tnahá tnúhu-ndo ndìhi Yá Ndiöxí vitna. ²² Chi diù cuendá-áⁿ nǐ xíhí Xítóhó Jesucrìstú núú cùrúxí cuendá sá nchóó ndùu ndoo nduu nine iní-ó ngündecu-o nǔú Yă Ndiöxí, te ducaⁿ te ñá

túú tnàhí-gá ná cumání-ó nǔú-gǎ, te vá yǎo ìíⁿ-gá cachí sá nchóó ndècu cuéchi-o. ²³ Te núú vá dáńá ndèé-ndó quíndáá ìní-ndó Xítóhó Jesucristú, te cundecu-ni-ndo ìchi-gá, te vá cání ìní-ndó dàńa-ndo tnúhu ndee ìní ní taxi-gá ndécú ndìhi-o. Te nchaa tnúhu-gá-áⁿ tá xíté nuu-xi nìhì ñuyú cuáháⁿ, te ñu-ni tnúhu-áⁿ càháⁿ yúhú té Pǎblú dánèhé-í ñáyiu.

Té Pǎblú yíhí dǐquí-dě càháⁿ-dé tnúhu Xítóhó Jesucristú núú ñáyiu ndècu ichi-gá

²⁴ Te vitna ío cùdíí ìní-í ndóhò-í cuendá-ndó, chi Xítóhó Jesucristú ío ní ndoho-gá cuendá-ó, te tnàhá yúhú ndóhò-í cuendá nchaa ñáyiu ndècu ichi-gá, dico vitna cùmání-gǎ ndoho-í cuendá-yu. ²⁵ Te Yá Ndiǒxí ní cachí-gá sá yǔhú quíhí dǐquí ñáhà-í xii nchaa nchòhó ñáyiu ndècu ichi-gá cuendá danèhé ñáhá vǎha-í xii-ndo tnúhu-gá cuendá cuu-xi sá vǎha sá cúú-xí-ndó. ²⁶ Te nchaa tnúhu sá dánèhé ñáhà-í xii-ndo ñà túú ní tècú dóho nchaa ñáyiu ní xíndecu ndéé sanaha, te mee-gǎ ní cuíní-gá sá ncháá nchòo ñáyiu yíndaha-gá vitna cundecu ndìhi-o tnúhu-áⁿ. ²⁷ Te mee-gǎ ní cachí-gá sá dátúu-gá nchaa tnúhu sá ýo vii ío váha cuáháⁿ núú nchàa ñáyiu yíndaha-gá. Te tnúhu-áⁿ cúú-xí cuendá tnàhá nchaa nchòhó ñáyiu ñá túú cùu ñáyiu isràél. Te tnúhu-áⁿ dánèhé ñáhá-xí xii-ndo sá Xítóhó Jesucristú ndécú ndìhi ñaha-gá xii-ndo. Te cuendá xǎⁿ ní ngúndecu ndìhi-ndo tnúhu ndee ìní cundecu-ndo ndìhi-gá ni caa ni quíhíⁿ.

²⁸ Te nchúhú mee-ni cuendá Xítóhó Jesucristú càháⁿ váha-ndí, te dàsahú-ndí ñáyiu nàcuáa cadá-yu. Te váha vìhi danèhé-ndí nchaa ñáyiu nàcuáa tecú tnùní-yu tnúhu-gá, te ducaⁿ dànehé-ndí-yu nàcuáa cundáá-yu núú Yá Ndiǒxí, te ducaⁿ chi tnàhá tnúhu-yu ndìhi Xítóhó

Jesucristú. ²⁹ Te cuendá xíǎⁿ ío ndùcu ndee-í quídè-í chiùⁿ Xítóhó Jesucristú, te mee-gǎ ío chindee ñaha-gá xii-í nõu xíǎⁿ ndácù-í quídè-í chiùⁿ-gá.

2

¹ Te cuiní-í sá nchòhó cutnùní iní-ndó sǎ ÿo sàni iní-í cuendá-ndó, ndìhi cuendá nchaa ñáyiù ndècu ñuú Laodiceá, ñáyiù xǐndecu ichi Xítóhó Jesucristú. Te ducaⁿ-ni ÿo sàni iní-í cuendá nchaa ñáyiù vátá quiní ñáhá-gǎ xii-í. ² Te cuiní-í sá nchòhó ndìhi nchaa ñáyiù-áⁿ ÿo nducu ndèe-ndo canchicúⁿ nihnu-ndo ìchi Xítóhó Jesucristú, te ío cuu iní tnáhá-ndó, te ducaⁿ cùu ìⁿnuu-ndo cundecu-ndo. Te cuiní-í sá nchòhó ndìhi dava-gá ñáyiù-áⁿ ÿo váha sáá sá xìní tnùní-ndó cuendá tecú tnùní-ndó nchaa nacuaá ndùu cuendá Xítóhó Jesucristú chi ío ndùu yuhu ni cuu, dico vitna ní dátũu-gá núú-ó. ³ Te Xítóhó Jesucristú néhé vǎha-gá nchaa tnúhu sá ÿo xìní ñuhu-xi tecú tnùní-ó. ⁴ Te duha càháⁿ-í chi cuiní-í sá vǎ quǐndáá iní-ndó nì ìⁿ tnúhu càháⁿ nchaa ñáyiù cuiní dandáhú ñáhá xii-ndo cuéi ío váha càháⁿ-yu. ⁵ Te cuéi ñǎ túú ndècu ndìhi ñaha-í xii-ndo dico ducaⁿ-ni ÿo ñùhu iní ñáhà-í, te ío cùdíí iní-í chi ñìhí-í tnúhu sá ÿo cùu ìⁿnuu-ndo ndecu-ndo, te ñǎ túú dàña ndeé-ndó sàndáá iní-ndó Xítóhó Jesucristú.

⁶ Te dàtná-ni ní sàndáá iní-ndó Xítóhó Jesucristú, te ducaⁿ-ni quǐndáá iní-ndó-gǎ canchicúⁿ nihnu-ndo ìchi-gá. ⁷ Te ni yùhu ni iní-ndó cànchicúⁿ nihnu-ndo ìchi-gá, te ducaⁿ cuíta cutnumí-gá iní-ndó nchaa nacuaá càháⁿ-gá quíhíⁿ. Te vá dáña ndèe tnàhí-ndo quǐndáá iní-ndó nchaa tnúhu sá nì dánèhé ñáhá cuè téé càháⁿ tnúhu-gá xii-ndo. Te xìní ñuhu-xi ndacáⁿ táhú vǐhi-ndo núú Yǎ Ndiõxí cuendá nchaa tnúhu-áⁿ.

Ñáyiù ío váha tnàhá tnúhu ndìhi Xítóhó Jesucristú

⁸ Te ío quihi iní-ndó cùndecu-ndo chi xìca cuu ñáyiú cuíní dandàhú ñáhá xìi-ndo, te ñáyiú-áⁿ càháⁿ-yu mee-ni nchàa tnúhu ní cahu iní nchaa cue téé ñuyúú-a, te nchaa tnúhu-áⁿ ñã túú vèdana nàndíhi-xi. Te ducaⁿ quidé-yu chi nchìcúⁿ nihnu-ní-yu nchaa nàcuáa ní xóo cada ñáyiú ní xíndecu ndéé sanaha. Te càháⁿ-yu nàcuáa sàni iní yucu ñãvãha, te ñá túú càháⁿ-yu nàcuáa cuíní méé Xítóhó Jesucrìstú.

⁹ Te Xítóhó Jesucrìstú cúu-gã ìⁿ ñáyiú dico ìⁿ-ni cùu-gá ndìhi Dútú Ndiõxí. ¹⁰ Te nchòhó chi ñá túú tnàhí-gá ná cúmãní-ndó nùú-gã chi ndècu ndìhi-ndo Xítóhó Jesucrìstú. Te ío cùnuu-gá te tàxi tnuní-gá nchaa núú cuè espíritú cùnùu. ¹¹ Te mee-gã ní ndada ndoo ní ndada nine-gá iní-ndó chi ní ngúndecu ndìhi-ndo-gã te ducaⁿ ñã túú-gã ndécú-ndó ìchi cuehé ichi duha, te cada iní-ndó sã ñí ngúndecu ndìhi-ndo ìⁿ seña, chi ní ndada ndoo ní ndada nine-gá iní-ndó, dico ñá díú ìⁿ-ni cuu-xi ndìhi seña sá sãha cue téé isràél ñii-güedé. ¹² Te nchòhó sa ní sandute-ndo te cada iní-ndó sã dàtná tnúhu sá ñí xíhí-ndó ndìhi Xítóhó Jesucrìstú, te ní nguíndüxi-ndo ndìhi-gá, te ní ndoto-ndo ndìhi-gá, te ducaⁿ càda iní-ndó chi ñá túú-gã ndécú-ndó ìchi cuehé ichi duha. Te ducaⁿ chi sàndáa iní-ndó nchàa nacuáa quide Yá Ndiõxí, te diu-gá ní dándótó-gã Xítóhó Jesucrìstú. ¹³ Te nchòhó cùtnàhá ndécú-ndó ìchi cuehé ichi duha cùu-ndo datná ñáyiú ní xíhí, chi ñá túú tnàhá tnúhu-ndo ndìhi Yá Ndiõxí ní cùu, te ni ñã díú ñáyiú isràél cúu-ndó. Te Yá Ndiõxí ní cachí-gá sá nchóó ìo váha tnahá tnúhu-o ndìhi Xítóhó Jesucrìstú vitna. Te ducaⁿ ñí quide-gá chi sa ní quide càhnu iní-gá nchaa sá cuehé sá dúhá ñí xóo cada-o. ¹⁴ Te vitna duuⁿ duuⁿ ñá túú-gã cuéchi-o ndècu núú-gã. Te nchoo ñã túú cuíní-ó càda-o nacuáa càháⁿ-gá, te cuendá xíãⁿ ío

ndècuéchi-o, te vùi nacháhu-o nǔú-gǎ ní cùu. Te vitna ñá túú-gǎ ni ìíⁿ cuéchi-o ndècu núú-gǎ, chi diu cuendá-áⁿ ñí xíhí Xítóhó Jesucristú núú cùrúxí. ¹⁵ Te sá dúcáⁿ ñí xíhí Xítóhó Jesucristú núú cùrúxí, te duuⁿ duuⁿ ní dáquée tǐhú-gǎ sácuíhná ndíhi nchaa espíritú cúndíhi-xi, te ní quendóo canúú-xi, te mee-gǎ ío cùnuu-gǎ táxí tnùní-gǎ.

Nanducu nihnu-o mee-ni sá vǎha càchí Xítóhó Jesucristú

¹⁶ Te núu dava ñáyiú xǐcuèhé ñáhǎ-yu xii-ndo cuendá sá ñà túú xèxi-ndo xìhi-ndo datná quidé mèe-yu te vá cádá cuendá-ndó, te ni vǎ cádá cuendá-ndó te núu xǐcuèhé ñáhǎ-yu xii-ndo cuendá sá ñà túú cǎnehe íí-ndó vico quide meé-yu núú cuíá núú cuíá, ndíhi vico quidé-yu ndi tnahá yóó, ndíhi cuendá sá ñà túú cǎnehe íí-ndó ndùu ndetatú-yu. ¹⁷ Te nàcuáa quidé-yu ndi tnahá òrè quidě-yu nchaa vico-áⁿ, ndíhi nàcuáa quidé-yu ndi tnahá nchaa nduu cǎnehe ìi-yu-áⁿ, te cada iní-ó sǎ sà quidě-yu-áⁿ dánèhé núú ñáhá-xí nàcuáa cada Xítóhó Jesucristú núú cuáháⁿ núú vèxi. ¹⁸ Te vá quíndáá iní-ndó ñí ìíⁿ tnúhu càháⁿ ñáyiú càchí sá cuíta nihnu-ndo cuendá sá ñǎ túú tnìi-ndo tnúhu càháⁿ-yu, chi càchí-yu sá ìo xìni ñuhu-xi cada cahnu-o nchaa cue espíritú xínú cuèchi núú Yǎ Ndiǒxí, te ni yùhu ñí iní-ó cǎnehe-o sá yíñùhu núú-xi. Te ñáyiú-áⁿ càchí-yu sá ndàá càháⁿ-yu chi dàcoto ñaha saní-yu nàcuáa cáháⁿ-yu, te ío quide cahnú-yu mèe-yu cuendá nchaa sá sání ìní mèe-yu quidé-yu, te ñá túú vèdana nàndíhi nchaa sá quidě-yu. ¹⁹ Te nchaa ñáyiú ducaⁿ xǐquide-áⁿ ñà túú tnàhá tnúhu-yu ndíhi Xítóhó Jesucristú. Te mee-gǎ cúú-gǎ Yaá cúnùu taxi tnuní ñáhá-gǎ xii nchaa nchoo ñáyiú ndècu ichi-gǎ, te chindee ñaha-gǎ xii-o ndècu-o ichi-gǎ, te mee-gǎ quidé-gǎ cúú ìíⁿnuu-o ndècu-o, te ta quide-o nchaa nacuáa cuíní Yǎ Ndiǒxí cuáháⁿ.

²⁰ Te nchòhó cúú-ndó dàtná ñáyiú ní xíhí ndìhì Xítóhó Jesucristú cuendá sá vǎ cǎnchícúⁿ nihnu-gá-ndó nàcuáa cǎháⁿ ñáyiú ñá túú ndècu ichi-gá. Te núu ducaⁿ ña, ¿te ná cuendá tñíí-ní-ndó tñùhu cǎháⁿ ñáyiú-áⁿ te quìde-ni-ndo datná quídě-yu? ²¹ Chi ñáyiú-áⁿ cǎchí-yu sá íó sá ni vǎ cúú tèe ndaha-o, te dava ni vǎ cúú cǎxi-o, te dava ni vǎ cúú tñí-o. ²² Te nchaa xǎⁿ, núú néhé chiúⁿ-ni-o ndìhì nihnu-xi. Te nchaa sá dúcáⁿ cǎháⁿ-yu-áⁿ cúú-xí mèe-ni sá ñí cahu iní méé nchàa ñáyiú ñuyíú-a nàcuáa cadá-yu cundecú-yu. ²³ Te nchaa tñúhu cǎháⁿ-yu-áⁿ sánùu sá cúú-xí ìⁿ tñúhu cǎháⁿ ìⁿ tée ío váha sàá díquí-xi, chi cǎchí-yu sá cadá cǎhnu-o Yá Ndiǒxí nàcuáa véxi iní méé-ó, te cunduu ndáhú iní-ó dico ñá túú dǎnehé ñáhǎ-yu nàcuáa tàú-xi cunduu. Te cǎchí tucú-yu sá cadá ùhú-ó mèe-o, chi ducaⁿ cuìní Yǎ Ndiǒxí cada-o cǎchí-yu. Te nchaa xǎⁿ ñá túú vèdana chindee ñaha-xi xii-o cuendá sá vǎ táxí tñùní ñáhá ñí ìⁿ sá cuèhé sá dúhá sàni iní-ó.

3

¹ Te nchòhó cada iní-ndó sǎ ñí xíhí-ndó ndìhì Xítóhó Jesucristú te ní ndoto-ndo ndìhì-gá, núu xǎⁿ tàú-ndó cǎda-ndo nchaa sá vǎha dàtná cuìní méé-gǎ chi mee-gǎ núcǒo-gǎ xio cùha Dútú Ndiǒxí chi tñàhá-gǎ ío cùnùu-gǎ. ² Te ío cuhuⁿ iní-ndó nchàa sá vǎha cǎchí Xítóhó Jesucristú nduu táhú-ndó cùndecu ndìhì-ndo, te vá cúhúⁿ ìní-ndó mèe-ni nchaa sá íó ñuyíú-a. ³ Te ducaⁿ cǎda-ndo chi cùu-ndo datná ñáyiú ní xíhí ndìhì Xítóhó Jesucristú, chi ñá túú-gǎ ndécú-ndó ìchi cuehé ichi duha. Te Yá Ndiǒxí néhé cuendá ñáhá-gǎ xii-ndo chi tñàhá tñúhu-ndo ndìhì Xítóhó Jesucristú. ⁴ Te Xítóhó Jesucristú cúú-gǎ Yaá ndécú ndìhì ñaha xii-o vitna, te sáá nduu quèe túu ndìhì ñaha-gǎ xii-o àndiú, te tñàhá-ó ìo cùnùu-o ndìhì-gǎ.

*Duu*ⁿ duuⁿ dañà-o nchàa sá cuèhé sá dúhá ñùhu iní-ó te cada-o mềe-ni sá vǎha

⁵ Te duuⁿ duuⁿ dañà-ndo nchàa sá cuèhé sá dúhá ñùhu iní-ndó. Te nchaa nchòhó cue tée vá càháⁿ ndìhi-ndo ñáyiu ðìhí te núu ñá ðíú ñàðihí-ndó cùú-yu, te ducaⁿ-ni nchàa nchohó cue ñáyiu ðìhí tucu vá càháⁿ ndìhi-ndo cuè tée te núu ñá ðíú yì-ndo cuu-güedé, te nchaa-ndo vǎ cání-gǎ iní-ndó càda-ndo ni ìⁿ sá cuèhé sá dúhá ndìhi tnaha ñáyiu-ndo. Te vá cání cuèhé cani duha-gǎ iní-ndó sǎ cúú-xí-ndó ndìhí-yu, te vá cání-gǎ iní-ndó nì ìⁿ sá cuèhé sá dúhá, te ni vǎ xíhó-ndó ìⁿ sá ndécú ndìhi tnaha ñáyiu-ndo, chi núu ducaⁿ na càda-ndo xiho-ndo sá ndécú ndìhí-yu te ìⁿ-ni cùu-ndo ndìhi ñáyiu chìnùhu nchaa sá càchí-yu cùu ndióxí te ñá ndàá sá ndióxí cúú nchàa xǎⁿ. ⁶ Te nchaa ñáyiu ducaⁿ xǐquide ío dandòho ñaha Yá Ndióxí xií-yu na sàá nduu tnúndòho tnúhu ndàhú, chi ñá túú sàndáá iní ñáhǎ-yu xii-gǎ. ⁷ Te nchòhó cútnàhá ní xíndecu-ndo ìchi cuehé ichi duha, te tnàhá-ndó nǐ xóo cada-ndo dàtná quidé nchàa ñáyiu-án. ⁸ Te vitna duuⁿ duuⁿ dañà-ndo nchàa sá ná càchí tnúhu-í-a: Vá cúðééⁿ-gǎ-ndó, te ni vǎ cùndùu líhli-gǎ iní-ndó, te ni vǎ cúú úhú-gǎ iní-ndó tnàha ñáyiu-ndo, te ni vǎ cùcuèhé-gǎ-ndǒ-yu, te ni ìⁿ-gǎ tnúhu cuèhé vá càháⁿ-ndó. ⁹ Te ni vǎ dácuañdehnde-gǎ-ndó, chi nchòhó sa ní dáñá-ndó nchàa ichi cuehé ichi duha, te ñá túú-gǎ sání cuèhé sání dùha iní-ndó nǎ cada-ndo vitna datná ní xóo cada-ndo. ¹⁰ Te vitna nchòhó ní nduu-ndo ñáyiu váha, te uuⁿ-gǎ tá cùtnuní iní-ndó nchàa nacuáa cuíní Yǎ Ndióxí cada-ndo, te ducaⁿ ta ndùcu ndee-ndo quide-ndo mee-ni sá vǎha dàtná quidé mềe-gǎ. ¹¹ Te vitna ní ngúndecu ndìhi-ndo Xíthóhó Jesucrìstú, te vá cádá cuendá-gǎ-ndó nùu cùu-ndo ñáyiu isràél àdi ñá túú cùu-ndo, te ni vǎ cádá cuendá-ndó nùu cùu-ndo ñáyiu ní ngúndecu sèñá ñì-xi

àdi ñáhá, te ni vǎ cǎdá cuendá-ndó nǔu cùu-ndo ñáyiu véxi ñuú xícá, te ni vǎ cǎdá cuendá-ndó nǔu cùu-ndo ñáyiu cùu neñuú, te ni vǎ cǎdá cuendá-ndó nǔu cùu-ndo ñáyiu ñá túú tnàhí dàñá quee núú chíúⁿ pàtróóⁿ-xi, te ni vǎ cǎdá cuendá-ndó nǔu cùu-ndo ñáyiu dàñá quée nǔú chíúⁿ pàtróóⁿ-xi, chi Xítohó Jesucrìstú cúnùu-gá ndécú ndìhi ñaha-gá xii-o nchàa-o.

¹² Te Yá Ndiöxí ní dáquée ðìⁿ ñaha-gá xii-ndo cuendá cundecu-ndo ndìhi-gá, te vitna cùu-ndo ñáyiu quide ndáá ndécú ìchi-gá. Te mee-gǎ ío cùu iní ñáhá-gǎ xii-ndo nǔu xǎⁿ tàú-ndó cùndahú iní tnáhá-ndó, te ío váha cuu iní-ndó chìndee tnaha-ndo, te cuu-ndo ñáyiu ndàhú iní-xi, te ío vii ío váha cuu iní-ndó cùndecu ndìhi tnaha-ndo, te ío càhnu cunduu iní-ndó cuendá nchaa sá quidé ñaha ñáyiu xii-ndo. ¹³ Te ducaⁿ cànehe-ndo tnúhu càhnu iní núú ndì mèe-ndo nacuáa ndècu-ndo ichi-gá, te cada càhnu tucu iní-ndó nǔu ná cúú sǎ cúmǎní nǔú tnáhá-ndó. Te dàtná ní quide càhnu iní Xítohó Jesucrìstú nchaa sá ñà túú vǎha ní xóo cada-ndo ducaⁿ càda-ndo cada cahnu iní-ndó nchàa sá cúmǎní nǔú tnáhá-ndó ndècu-ndo. ¹⁴ Te xìni ñuhu vihi-xi sá ío cuu iní tnáhá-ndó cùndecu-ndo, chi núú ducaⁿ na càda-ndo, te quide-ndo nchaa dava-gá sá càháⁿ-í, te ñá túú tnàhí-gá ná cúmǎní-ndó. ¹⁵ Te dañà-ndo sǎ Yǎ Ndiöxí ná chìndee ñaha-gá nàcuáa ío váha cuu iní-ndó cùndecu-ndo, chi ðiu cuendá-án ñí çáhánⁿ ñáhá Yǎ Ndiöxí xii-ndo cuendá cuu ìⁿnuu-ndo ndìhi nchaa dava-gá ñáyiu ndècu ichi-gá, te ducaⁿ-ni ïo ndacáⁿ táhú-ndó núú-gǎ.

¹⁶ Te ío cuhuⁿ iní-ndó tnúhu Xítohó Jesucrìstú, te ío váha cuáha-ndo cuendá nàcuáa càháⁿ tnúhu-gá te ducaⁿ dànehé tnáhá-ndó. Te ío càháⁿ dóho tnàha-ndo nacuáa cada-ndo càchicúⁿ nihnu-ndo càda-ndo nchaa nacuáa càháⁿ tnúhu-gá, te cata-ndo ndùdú ndèé núú tùtú Yǎ Ndiöxí, ndìhi nchaa dava-gá ndudú sá xìní

méé-ndó xità-ndo te nchaa xǎⁿ cata-ndo chĩñuhu-ndo Yá Ndiǒxí. Te òré xítá-ndó te ni yùhu ni iní-ndó ndàcáⁿ táhú-ndó nǔú-gǎ. ¹⁷ Te cuhuⁿ iní-ndó Xítóhó Jesucrístú òré sání iní-ndó càda-ndo ìⁿ chiuⁿ àdi ná tnúhu cuìní-ndó cǎháⁿ-ndó, te ñi-ni-gǎ cuhuⁿ iní-ndó. Te xìni ñuhu-xi ndacáⁿ táhú-ndó nǔú Yǎ Ndiǒxí, te ñi-ni Xítóhó Jesucrístú chindee ñàha-gǎ xii-ndo ndàcáⁿ táhú-ndó nǔú Tǎtá-ó Dǔtú Ndiǒxí.

Nàcuáa tàù ñáyiù ndècu ichi Xítóhó Jesucrístú cadá-yu sá cúú-xí ndì meé-yu

¹⁸ Te nchaa nchòhó ñáyiù ñìhí ñáyiù ndècu yìi-xi quindáá iní-ndó yìi-ndo, chi ducaⁿ tàù-xi cada nchaa ñáyiù ñìhí ndécú ìchi Xítóhó Jesucrístú. ¹⁹ Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cǔcuèhé-ndǒ-yu. ²⁰ Te nchaa nchòhó ñáyiù ndècu tátá-xi ndihí ñáná-xi quindáá iní-ndǒ-yu, chi núu ducaⁿ na càda-ndo te ndùu vétú iní Yǎ Ndiǒxí. ²¹ Te nchaa nchòhó ñáyiù cùu tátá ndihí ñáná vá dásatú-ndó ìni cue déhe-ndo, chi núu ducaⁿ na càda-ndo te ni vǎ quíxí-gǎ iní-güexi cada-güexi sá vǎha. ²² Te nchaa nchòhó ñáyiù xìnu cuechi quindáá iní-ndó nchàa ñáyiù cùu patróóⁿ-ndó, te ni yùhu ni iní-ndó càda-ndo nchaa chiuⁿ tahú-yu cuèi òré ndécǔ-yu àdi oré ñá túù-yu, te ñá díú òré-ni ndèhé-yu cada-ndo cuèndá-ni sá cuìní-ndó cùdiu-ndo núù-yu, chi cada-ndo sǎ néhé-ndó sá yíñuhu núú Xítóhó Jesucrístú. ²³ Te nchaa chiuⁿ sani iní-ndó càda-ndo te cada-ndo ñì yuhu ni iní-ndó, te sá dúcáⁿ càda-ndo-án te cada-ndo cuèndá sá xínú cuèchi-ndo núú Xítóhó Jesucrístú te ñá díú nǔú ñáyiù ñuyíú-a xìnu cuechi-ndo. ²⁴ Te nchòhó sa nàha-ndo sá Xítóhó Jesucrístú taxi-gǎ sá ndúú táhú-ndó te núu ducaⁿ na càda-ndo, chi cùu-ndo ñáyiù xìnu cuechi núú-gǎ. ²⁵ Te nchaa ñáyiù

quìde nchaa sá cuèhé sá dúhá nàcháhu-yu núú Yă Ndiöxí cuendá nchaa sá quídě-yu, te mee-gă vá cáda cuendá-gá cuěi náí ñáyiú cùú-yu, chi ncháá-yu nacháhu-yu nchaa sá ñà túú vâha quídé-yu núú-gă.

4

¹ Te nchaa nchòhó ñáyiú cùú patróóⁿ cuu-ndo ñăyiú váha, te cada-ndo nchàa nacuáa tàú-xi cunduu ndihi nchaa ñáyiú xínu cuechi núú-ndó, te cunaha-ndo sã àndiú ndecu Yaá cúú Xítóhó-ndó tàxi tnuní ñáhá-gă xii-ndo.

² Te nchaa nchòhó ñáyiú ndècu ichi Xítóhó Jesucristú, vá dáñá ndèé-ndó cãháⁿ ndihi-ndo Yă Ndiöxí, te ío cuhuⁿ iní-ndó-gă òré cãháⁿ ndihi-ndo-gă, te òré-áⁿ ïo ndacáⁿ táhú-ndó núú-gă. ³ Te cãcáⁿ táhú-ndó tnàhá cuendá-ndí núú-gă cuendá sá díú-gă ná cáda te ndacu-ndí cãháⁿ-ndí tnúhu-gá núú nchàa dava-gá ñáyiú, te ducaⁿ cãháⁿ-ndí tnúhu Xítóhó Jesucristú sá ñă túú ní xíndecu ndihi nchaa ñáyiú ní xíndecu ndéé sanaha, te diu cuendá tnúhu-áⁿ yíhí-í vecaá vitna. ⁴ Te cãháⁿ ndihi-ndo Yă Ndiöxí cuendá cãháⁿ-í nàcuáa tàú-xi cunduu te tecú tnùní-yu.

⁵ Te cada-ndo nchàa nacuáa tàú-xi cunduu sá cúú-xí nchàa ñáyiú ñà túú ndècu ichi-gá, te ducaⁿ-ni ïo nducu ndèé-ndo cada-ndo nchaa nacuáa tàú-xi cunduu. ⁶ Te cada cuendá-ndó sã ïo vii ío váha cunduu tnúhu cãháⁿ ndihi-ndö-yu, te cãháⁿ-ndó ìⁿ tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ìⁿ ìⁿ-yu.

Tnúhu ndéé núú ñí ndihi-ná

⁷ Te té Tìquicú téé ío cùú iní-ó ndècu ndihi-o ichi Xítóhó Jesucristú, téé-áⁿ cachí tnúhu-dé nchaa nàcuáa cùú ndecu-í. Te tnàhá-dé xínú cuèchi-dé núú Xítóhó Jesucristú te ío váha quìde ndáá-dé. ⁸ Te tendaha-ï-dé quixi-dé cachí tnúhu-dé nchaa nàcuáa cùú ndecu-ndí iha,

te taxi-dé tnúhu ndee iní cundecu ndihi-ndo. ⁹ Te tnàhá tucu té Ònésimú tée ío cùu iní-ó ndècu ndihi-o ichi Xítohó Jesucristú quixi ndihi-dé, te diu-ni tée ñuú-ndó cùu-dé te tnàhá-dé ío váha quide ndáá-dé. Te ndi ndúú-güedé cachí tnúhu-güedé nchaa nàcuáa cùu iha.

¹⁰ Te té Arístarcú tée yìhi ndihi-í vecaá quidé ndèe iní ñáhá-dě xii-ndo ndihi té Măcú ñani přimú tě Bèe. Te sa nàha-ndo nchaa nacuáa ní cáháⁿ-í cada-ndo quèheⁿ cuendá-ndó tě Măcú, te núu na quixi-dé quixi coto ñaha-dě xii-ndo, te ío váha cuu iní-ndó quèheⁿ cuendá-ndó-dě. ¹¹ Te tnàhá tée nàni Jesús, àdi Bustú chi úú diu-dé, quidé ndèe iní ñáhá-dě xii-ndo. Te cue tée-a cùu-güedé cue tée isràél ní chitnahá ñáhá-güedě xii-í càháⁿ-ndí núu ñăyiu nàcuáa ndíhu ndaha ñàha Yá Ndiöxí xíi-yu, te ni ìⁿ-gá ñăyiu isràél ñá túú quide datná quidé-güedě. Te ío váha tàxi-güedé tnúhu ndee iní xii-í. ¹² Te tnàhá tée ñuú-ndó tě Ěpafrás quidé ndèe iní ñáhá-dě xii-ndo, te cùu-dé tnàhá-dé tée xinu cuechi núu Xítohó Jesucristú. Te ducaⁿ-ni ñi yuhu ñi iní-dé xicáⁿ táhú-dě núu Yă Ndiöxí cuendá-ndó cuendá sá cānchícúⁿ nihnu-ni-ndo ìchi-gá, te ducaⁿ te ío váha tecú tnúni-ndó nchàa nacuáa cuiní Yă Ndiöxí cada-ndo, te diu-ni ducaⁿ cānchícúⁿ nihnu-ndo càda-ndo. ¹³ Te yúhú cāchí tnúhu ndáá-í xii-ndo sã sũúni sàni iní-dé sá mée-ní sã vāha cuu xii-ndo cūndecu-ndo ndihi nchaa ñăyiu xīndecu ichi Xítohó Jesucristú ndécú ñúú Laodiceá, ndihi nchaa ñăyiu xīndecu tucu ichi-gá ndécú ñúú Hièrápólís. ¹⁴ Te tnàhá té Lùcá tée xíní nchaa núu yücú sã quidé tātna quide ndee iní ñáhá-dě xii-ndo tée ío cùu iní-ó, te tnàhá tucu té Dēmás quidé ndèe iní ñáhá-dě xii-ndo.

¹⁵ Te cúñaha-ndo na càda ndee iní nchaa ñăyiu ndècu ndihi-o ichi Xítohó Jesucristú ndécú ñúú Laodiceá, ndihi tá Mĩnfás, ndihi nchaa ñăyiu ndècu ichi-gá tàcá vehe-xi

dàcuahá-yu tnúhu-gá. ¹⁶ Te tutú cádũha-í-a tendaha-ĩ quixi ndaha-ndo, te òré ná ndíhí dàucaha-ndo te tendaha-ndo quíhíⁿ ndaha ñáyiú xĩndecu ichi-gá ndécú ñùú Laodiceá cuèndá dacuàhá-yu tnàhá-yu. Te diu-ni ducaⁿ dàucaha-ndo tutú tendaha-ĩ quíhíⁿ ndaha ñáyiú ñuú Laodiceá òré ná dándixí-yu ndaha-ndo. ¹⁷ Te na cächí tnúhu-í xii-ndo nàcuáa cúñaha-ndo xii té Àrquipú, te duha cúñaha-ndo xii-dé: “Yá Ndiöxí ní taxi-gá chiúⁿ quide-n, te ío váha cada cuèndá-n càda-n nchaa nacuáa ní cachí-gá”, duha cúñaha-ndo xii-dé.

¹⁸ Te yúhú té Păblú ndihí ndaha mee-ĩ téè-í iⁿ ũú tnúhu-a quide ndee iní ñáhà-í xii-ndo, te cunaha-ndo sã yǔhú yíhí-í vecaá. Te Yá Ndiöxí ío na chĩndee chitúu ñaha-gă xii-ndo. Te ducaⁿ na cùnduu. Te ío chí cádá ndèe iní-nă vitna.

Tnúhu ní cáháⁿ yă ndiöxí xito cùu uú

New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates

eBible.org

